

25 FEB 1999

Mahathir-Teladan

DR M PEMIMPIN ISLAM TELADAN, DIKAGUMI ARAB

KUALA LUMPUR, 25 Feb (Bernama) -- Datuk Seri Dr Mahathir Mohamad pada pandangan editor-editor akhbar utama Arab adalah teladan pemimpin sebuah negara Islam yang mengkagumkan.

Mereka kagum dengan kelantangan Perdana Menteri bersuara di pentas antarabangsa bagi mengutarakan kepentingan negara-negara dunia ketiga termasuk dunia Arab dan Islam.

Mereka juga kagum dengan kepimpinan Dr Mahathir yang memacu pertumbuhan ekonomi dan pembangunan Malaysia yang bersaiz kerdil tetapi mampu menduduki tangga ke-17 antara negara-negara perdagangan di dunia.

Lebih dari itu, mereka melihat Dr Mahathir sebagai ahli pemikir Islam yang ulung yang mampu menterjemahkan tuntutan Islam secara praktikal dan menjadikannya kunci kejayaan Malaysia.

Mereka menyatakan pemerhatian dan kekaguman mereka itu pada pertemuan hampir dua jam antara Dr Mahathir dengan tujuh pengarang termasuk dari Mesir dan Jordan di pejabatnya di sini kelmarin.

Para editor itu dalam lawatan untuk mengenali Malaysia dari dekat setelah sebelum ini hanya mengkaguminya dari jauh.

Penerbit akhbar Al-Ray Al-Naam, Sudan, Mahgoub Mohamed El-Hassan Erwa berkata, Dr Mahathir baginya adalah negarawan dan ahli fikir Islam yang ulung pada masa ini untuk diteladani pemimpin Islam lain.

Katanya, Malaysia perlu berkongsi dengan negara-negara Arab bukan sahaja kaedah mencipta kejayaan ekonomi tetapi juga rahsia bagi kestabilan dan kerukunan hidup aman damai rakyat berbilang kaum.

"Rahsia itu perlu dikongsi dengan negara-negara Arab yang kini tidak putus-putus cuba dilaga-lagakan oleh barat seperti antara Sudan dengan Mesir," kata beliau dalam Bahasa Arab dan diterjemahkan ke Bahasa Malaysia.

Mahgoub berkata beliau akan memberi perhatian terhadap setiap saranan mengenai ekonomi Islam oleh Dr Mahathir pada masa akan datang.

Bagi editor akhbar Al Zahap Al Akhbar, Libya, Dr Abdul Kadir Ibrahim Al-Hadhiri pula, beliau amat tertarik dengan rancangan pembangunan lima tahun Malaysia yang dianggapnya kunci kejayaan tersusun dan berterusan yang dinikmati Malaysia.

"Negara-negara Islam dapat belajar banyak daripada Malaysia dan mencontohinya untuk merintis kejayaan terutama bagi membebaskan diri dari kemiskinan," katanya.

Dr Mahathir, yang merendah diri dan mengakui tidak berhasrat untuk "mengajar" mana-mana negara lain, menyatakan kesanggupan Malaysia untuk berkongsi pengetahuan dan pengalaman itu.

Perdana Menteri mempelawa para pegawai dari Libya datang ke Malaysia untuk menimba pengetahuan mengenai rancangan lima tahun itu.

Dr Mahathir juga membuatkan editor dari Libya itu terpegun dengan ulasannya terhadap "Buku Hijau" tulisan Presiden Libya Muammar Al-Qadaffi.

Katanya, pendapat dalam buku itu hampir sama dengan pendapat Malaysia tentang bagaimana dunia ketiga harus bergerak.

Sebelum itu editor itu berkata, selain Qadaffi, Dr Mahathir adalah pemimpin dunia yang dikaguminya sejak dahulu.

Pewartu Ekonomi kanan The News, Pakistan, Kiani Khaleeq Ahmad Khan pula berkata, beliau tertarik dengan idea Dr Mahathir mengenai langkah untuk keluar dari kegawatan ekonomi yang telah dilaksanakan oleh Malaysia dengan jayanya.

Beliau berharap Dr Mahathir dapat juga memberikan pandangan berterusan

kepada negara-negara Islam serta nasihat yang dapat mengeluarkan mereka daripada kemelut ekonomi.

Beliau terpegun dengan pandangan Dr Mahathir mengenai Pakistan yang dianggap oleh Perdana Menteri sebagai sebuah negara Islam yang sangat kaya dan berpotensi menjadi negara Islam yang kuat jika dapat mengatasi masalah dalamannya.

Dr Mahathir berpendapat sekatan ekonomi yang dikenakan terhadap Pakistan sebagai tidak adil kerana negara-negara lain yang juga mempunyai senjata nuklear seperti Israel tidak dikenakan sekatan ekonomi dan perdagangan.

Para editor itu, setelah melihat dengan mata sendiri keadaan sebenar di Malaysia, berjanji untuk memberikan pandangan yang lebih jelas tentang Malaysia kepada pembaca akhbar di negara masing-masing, yang sebelum ini banyak bergantung kepada laporan tidak tepat media massa barat.

-- BERNAMA

MNY NMO